

Radiukkut tv-kkullu aallakaatitsisarneq pillugu Inatsisartut peqqussutissaattut siunnersuut.

Akissuteqaat

(Kultureqarnermut, Ilinniartitaanermut Ilisimatusanermut Ilageeqarnermullu Naalakkersuisoq)

Aappassaaneerpeqarnera

Naalakkersuisut naammagisimaarlugu paasivaat, radiukkut tv-kkullu aallakaatitsisarneq pillugu Inatsisartut peqqussutissaattut siunnersuut Naalakkersuisunit saqqummiunneqartoq Inatsisartut Kultureqarnermut, Ilinniartitaanermut Ilageeqarnermullu Ataatsimiititaliaata amerlanerpaatigut tapersersora.

Ataatsimiititaliap peqqussutissatut siunnersuutip tusarniaassutigineqarnera pillugu oqaaseqaatai Naalakkersuisut aallarniutitut oqaaseqarfigisariaqarsoraat. Tassunga atatillugu eqqaasitsissutigineqassaaq siunnersuut tusarniaassutigineqartoq siunnersuummik siusinnerusukkut tusarniaassutigineqareersumik aallaaveqarmat. Taassuma saniatigut aamma tusarniaaffigineqartut pingaarnersaat inatsisissap piareersarneqarnera tamaat qanimut ingerlaavartumillu suleqatigineqarsimapput. Naalakkersuisut taamatut oqaaseqarlutik ataatsimiititaliap tusarniaaneq pillugu oqaaseqaatai tusaatissatut tiguaat.

Ataatsimiititaliap aallarniutigalugu Naalakkersuisut qinnuigai KNR-imut aningaasaliissutaasartut eqqarsaatigeqqeqqullugit. Siunnersuummut oqaaseqaatini atuarneqarsinnaasutuut Naalakkersuisut naliliipput, pisussaaffiit ataasiakkaat aningaasaliissutaareersut iluanni naammaginartumik piviusunngortinneqarsinnaassasut. Aammami pisussaaffiit ataasiakkaat annertussusii imarisaallu pisortat sullissinerannik (Public Service) isumaqatigiissuteqartarnissami isumaqatigiinniutigineqartartussaapput. Digitaliseriinissap piviusunngortinneqarnissaa siunertaralugu KNR-ip teknikkikkut atortorissaarutaasa nutarternissaannik pisariaqartitsinermik misissuinissamut tunngatillugu oqaatigineqarsinnaavoq, tamakku pillugit oqaloqatigiinnerit KNR-ip aamma Kultureqarnermut, Ilinniartitaanermut, Ilisimatusanermut Ilageeqarnermullu Pisorta qarfiup aallartereeramatigik.

Ataatsimiititaliap peqqussutissatut siunnersuutip imarisarpiaanut tunngatillugu siullertut oqaaseqaateqarfigaa, aallakaatitassianik kalaallisut oqaasertalinnik pingaarnerutitsinissamik siunnersuutip anguniagaa. Aallakaatitassianik kalaallisut oqaasertalinnik pingaarnerutitsinissamut tunngatillugu ataatsimiititaliap oqaaseqaatai nalinginnaasut Naalakkersuisut tamakkiisumik isumaqatigisinnaavaat. Ataatsimiititaliami ikinnerussuteqartut, tassaasut Demokratit, Naalakkersuisunik peqqusipput nuna tamakkerlugu kanalimik, Danmarks Radio-p aallakaatitaasa toqqaannartumik aallakaatinneqarfissaannik pilersitseqqullugit, taamaaliornikkut KNR-ip aallakaatitassiat Kalaallit Nunaanni aallakaatitassiarineqartut kalaallisullu oqaasertallit annertunerusumik aallussinnaalissammagit. Inatsisitigoortumik KNR peqquneqarsinnaanngilaq Danmarks Radio-p imaluunniit radioqarfiup tv-qarfiulluunniit allap aallakaatitaanik aallakaatitseqqullugu. Tamanna aallakaatitsiviup pineqartup aallakaatitanik piginnittussaananeramik innarliinerussaaq. Taannaannarluunniit pissutigalugu ikinnerussuteqartut inassuteqaataat piviusunnagortinneqarsinnaanngilaq. Aamma KNR-ip aallakaatitsisarnerminik aaqqissuussisinnaatitaananeranut taama toqqaannartigisumik aalajangersimatigisumillu akuliuttoqassappat tamanna KNR-ip nammineersinnaassusianik innarliinerujussuussaaq. Aamma kanalimik nutaanik atuilernissaaq pillugu apeqqut aallakaatitsinermut aqqutit digitalisererneqarnissaat pillugu suleqatigiissitaliamit suliarineqartussaavoq.

Aamma ataatsimiititaliap Danmarks Radio-p aallakaatitaanik atuneq pillugu oqaatigisaanut Naalakkersuisut naqqiuteqalaassapput. Tassa KNR-ip aallakaatitanik kissaatigineqartunik sunilluunniit aningaasartuutitaqanngitsumik atuisinnaanera eqqunngilaq. Maannakkut isumaqatigiissutaasumi akiliummik isumaqatigiissuteqartoqarnikuuvoq, naak akiliut taanna annertunngikkaluartoq.

Ataatsimiititaliap radio tv-lu pillugit ataatsimiititaliamut tunngatillugu Naalakkersuisunut inassutigaa, radio tv-lu pillugit ataatsimiititaliamik pilersitsinermut aningaasaliissutit annertussusii eqqarsaatigeqqinneqassasut. Ataatsimiititaliap tassunga atatillugu oqaatigaa ataatsimiititaliamik pilersitsinerup siunertaa pingaarneq tassaasoq aallakaatitsisinnaanermut akuersissutinut tunngatillugu suleriaatsip pisariillisarneqarnissaa eqaallisarneqarnissaalu. Ataatsimiititaliamik pilersitsinerup siunertaa pillugu Naalakkersuisut oqaatigissavaat, aallakaatitsisinnaanermut akuersissutinut tunngatillugu suleriaatsip pisariillisarneqarnissaata eqaallisarneqarnissaatalu pingaarnertut siunertaananeramik oqarneq eqqunngimmat. Tassami peqqussutissatut siunnersuummut oqaaseqaatini allassimavoq ataatsimiititamik pilersitsinerup radiumut tv-mullu tunngasunik sutigit tamatigit pitsannorsaataanissaa naatsorsuutigineqartoq. Taakku tungaasigut paasisimasaqarluartut ataatsimiititaliami siunnersuutigineqartumi ataatsimoortinnerisigut sullissisoq Naalakkersuisunut siunnersortitut iluaqutaalluaannangitsoq, aammali radiumik tv-millu suliaqartut aamma iluaqutigisinnaasaat pigineqaleriartussaaq. Aammattaaq ataatsimiititaliap pilersinneqarnerata kingunerissavaa taakku tungaasigut nakkutilliinermik suliaassat maannakkumornit annertunerusumik malitsinneqarsinnaanissaat.

Naalakkersuisut radio tv-lu pillugit maalaartarfik maannakkut atuuttoq pillugu oqaatigisinnaavaat, maalaartarfiup taassuma atorunnaarsinneqarneratigut

sipaaruteqartoqarnissaanik naatsorsuutiginnittoqannginneranut tunngaviusoq tassaammat, maalaartarfik taanna ukiuni arlalinni sulisimangimmat maalaartarfimmut suliakkiissuteqartoqarsimanginnera pissutigalugu. Tassunga atatillugu eqqaasitsissutigineqassaaq ataatsimiititaliaq nutaaq siunnersuutigineqartoq radio tv-lu pillugit maalaartarfimmit maannakkut atuuttumit allaanerujussuarmik annertunerujussuarmillu akisussaaffeqartussaammat.

Tusarnaartartut pillugit misissuisitsisarnissanut aningaasaliissutinut tunngatillugu Naalackersuisut eqqaasitsissutigerusuppaat pineqartut tassaassammata attuumassuteqanngitsut avataaneersut misissuisarnissaat, KNR-illu aallakaatitaannaanut tunngassuteqanngitsut. Tassa imaappoq pisariaqartitsinernik misissuinerit aamma tusarnaartartut isiginnaartartullu aallakaatinneqartartunik allanillu radiukkut tv-kkullu neqeroorutaasartunik atuineri pillugit ingerlaavartumik misissuisoqartassaaq. Taamaalillutik misissuinerit inernerit aamma atuisunut, suliaqartunut, tassa imaappoq KNR-imut sumiiffinnilu radioqarfinnut tv-qarfinnullu, aammalu Naalackersuisunut pingaaruteqarsinnaassapput. Ilanngullugu oqaatigineqassaaq KNR-ip oqaatigisimmamagu, aallakaatitsivik aningaasaliissutit pioreersut iluanni tusarnaartartut isiginnaartartullu pillugit misissuinerit taamaattunik suliaqarnissaminut akissaqanngitsooq. Misissuisitsisarnissanut aningaasaliissutissatut missingersuutit misissuinerit taamaattut akigisartagaat pillugit paasisutissanik piniarneqarsimasunik tunngaveqarput. Naalackersuisut tamanna tunngavigalugu radio tv-lu pillugit ataatsimiititaliamut aningaasaliissutit allanngortinneqarnissaannik siunnersuuteqarnissaminnut pissutissaqarsorinngillat.

Ataatsimiititaliap tulliullugu inassutigaa siunnersuummi § 29, imm. 3 peerneqassasoq. Ataatsimiititaliap taama inassuteqarnerminut tunngavilersuummisut oqaatigaa, KNR sullissinernik assigiinngitsunik suliaqartartunut unammillertitut ingerlalissanngitsooq taamatullu isigineqassanngitsooq. Aalajangersakkap siunnersuummi ilanngunneqarneratigit siunertarineqarpoq KNR allamik ingerlataqarsinnaasunngorlugu periarfissaasa annertusineqarnissaat. KNR-ip ingerlatsinera siunnersuummi § 29, imm. 6 malillugu unammilleqatigiinnermik tunngaveqarluni pissaaq. Ataatsimiititaliarli isumaqatigiisooq tamanna pillugu ersarissumik inassuteqarmat Naalackersuisut allannguutissatut siunnersuummik taassumunnga naapertuuttumik saqqummiussipput.

Ataatsimiititaliap aallakaatitassianik paarlaateqatigiittarnissaq aallakaatitassioqatigiittarnissarlu pillugit oqaatigisimavaa, KNR-ip tusagassiuutinik atuinissamut sungiusarfimmik sulisut ilinniarnermikk nangitsinissaannut periarfissiisinnaasumik, tassungalu ilutigitillugu inuusuttut radioqarnermi tv-qarnermilu qanoq suleriaaseqartoqartarneranik paasisaqarnissaannik periarfissiisinnaasumik pilersitsinissamik pilersaarutai tapersorsorini. Ataatsimiititaliap Naalackersuisunut inassutigaa isummat taakku aamma Naalackersuisunit tapersorsorneqassasut. Tusagassiuutinik atuinissamut sungiusarfimmik pilersitsiniarluni siunertat taaneqartut Naalackersuisut tapersorsorpaat, kisianni tassunga ilutigitillugu ilisimaqqussallugu siunertat aamma allatigit, aammalu KNR-ip pilersaarutitut siunnersuummisut maannamut saqqummiussimasaanit annikinnerusumik anguniagaqarnikkut piviusunngortinneqarsinnaanissaat Naalackersuisut nalilermassuk. Aammattaaq

Naalackersuisut ilisimaqqussavaat sumiiffinni radioqarfinni tv-qarfinnilu sulisuusunik pikkorissartitsisarnerit Namminersornerullutik Oqartussanit tapiiffigineqartartut maannakkut ingerlanneqartareermata. Taamaammata Naalackersuisut KNR aamma STTK tamanna pillugu erseqqinnerusumik oqaloqatigeqqaarniarpaat, matumani aamma pisortat sullissinerannik (Public Service) isumaqatigiissummik KNR-imut isumaqatigiissuteqarnissamut atatillugu.

Kiisalu ataatsimiititaliaq KNR-ip siulersuisuisa nutaamik katitigaalernissaannik siunnersuut pillugu oqaaseqaateqarpoq. Amerlanerussuteqartut, tassaasut Siumut, Inuit Ataqtatigiit aamma Atassut, siulersuisuni ilaasortat suliamik ilisimasaqarluartuunissaannik isummat nutaat, taamaalillutillu siunnersuut taamatut ilusilik tapersersorpaat. Ikinnerussuteqartut, tassaasut Demokratit, siunnersuutigaat partiit siulersuisuni ilaasortassanik toqqaanissamut periarfissaqaannassasut, siulersuisunili ilaasortat sinneri siulersuisut suliamik ilisimasaqarluarnerunissaannik isummamik aallaaveqarluni toqqarneqartarsinnaasut.

Immikkut soqutigisaqatigiit suliffeqarfiillu partiinut sanilliullutik innuttaasunit tapersersorneqannginnerunerarlugit ikinnerussuteqartut oqaatigisaannut tunngatillugu Naalackersuisut oqartariaqarput tassunga isumaqataanngilluinnarlutik. Tassa imaappoq sinerissami tusagassiiwiit takusassiiwiillu kattuffiat innuttaasunit tapersersorneqarsimanngippat tamanna sumik patsiseqarneris Naalackersuisut paasiuminaatsippaat. Kattuffiup sumiiffinni radioqarfiit tv-qarfiillu, tamarmik immikkut sumiiffimminni innuttaasunit tapersersugaasut sinniisuuffigai. Tusarnaartartut isiginnaartartullu kattuffiannik pilersitsisoqarpat aamma taassuma innuttaasunit soq tapersersorneqannginnissaa takujuminaassaaq. Siulersuisut nutaamik katitigaalernissaannik siunnersuutip naalackersuineranut attuumassuteqanngitsunik siulersuisoqarnertut taaneqarsinnaannginneranik ikinnerussuteqartut oqaatigisaannut tunngatillugu Naalackersuisut siullermik erseqqissassavaat, siulersuisuni ilaasortat amerlanersaat inassuteqartoqarnera tunngavigalugu toqqarneqartussaammata. Taamaammata taakku politikikkut toqqagaasut isigineqarsinnaanngillat. Taassuma saniatigut aamma aalajangiisuulluinnartoq tassaavoq siulersuisut suliamik ilisimasaqarluartuunissaat Naalackersuisut kissaatigimassuk, tassa politikikkut toqqaanermut taarsiullugu, tassanimi suliffeqarfiup atugarissaarnissaa pinnagu politikki pingaarnerteqqajaaneqalersinnaammata.

Aamma ataatsimiititaliap isumaqatigiissup tusarnaartartut isiginnaartartullu nuna tamakkerlugu kattuffiinik pilersitsinissaaq tapersersorpaa Naalackersuisunullu inassutigalugu aamma taakku tapersersuissasut. Ataatsimiititaliap isumaa Naalackersuisut isumaqatigilluinnarpaat, neriutugalugulu taamaaliornissamik soqutiginnilerneq siunnersuutip matuma suliarineqarnerani pilerumaartoq.

Naalackersuisut taamaatut oqaaseqarlutik inassutigaa siunnersuutip allannguutissatut siunnersuutikkut saqqummiunneqarnermisut maannakkutut iluseqarluni aalajangiutivinneqarnissaa.